

光緒山西通志

名宦錄五

錄一之五

山西通志第一百五

明進士出身頭品頂戴兵部侍郎兼都察院右副都御史巡撫山西提督軍務臣張鼎舉
旨監修

守令

漢至五代

任敖故沛獄吏高祖東擊項籍敖遷爲上黨守陳豨反時敖
堅守封爲廣阿侯食千八百戶高后時爲御史大夫三歲免
蔣滿宣帝時爲上黨太守子萬爲北地都尉並以卓異徵萬
退卻不敢並父帝問贊謁者以父子對帝歎息曰乃父子剖
符耶卽下詔曰上黨守滿經行篤著信行山東其以滿爲淮
陽王相誨導東藩宏農股肱郡其以萬爲宏農太守同日拜
擢一時榮之

荀諫爲上黨太守哀帝時王莽欲滅鮑宣子孫都尉路平承

望風旨規欲害宣子永諫擁護永召以爲吏常置府中永因數爲諫陳興復漢室翦滅篡逆之策諫每戒永曰君長幾事不密禍倚人門永感其言及諫卒自送喪歸扶風路平遂收永弟升後太守趙興到歎曰我受漢茅土不能立節而鮑宣死之豈可害其子也出升復署永功曹

班稚長子令彪之父有善治

以上潞安府

共友代郡太守武帝元朔三年匈奴入塞殺略死之

馮參上黨潞人爲涇陵令徙爲郎永始三年遷代郡太守民

甚德之

以上大同府

李廣隴西成紀人世世受射景帝時爲雁門雲中太守武帝卽位左右言廣名將也入爲未央衛尉後爲驍騎將軍屬護軍將軍軍馬邑旁漢軍皆無功後四歲以衛尉爲將軍出雁

門塞北兵多破廣軍生得廣單于素聞廣賢令曰得李廣必
生致之騎得廣廣時傷置兩馬間絡而盛之臥行十餘里廣
陽死睨其旁有一兒騎善馬暫騰而上馬因抱兒鞭馬南馳
數十里得其餘軍騎數百追之廣行取兒弓射殺追騎以故
得脫至漢贖爲庶人元朔六年廣復爲將軍出定襄諸將多
爲侯者而廣軍無功廣厯七郡太守前後四十餘年得賞賜
輒分其麾下飲食與士卒共之家無餘財終不言生產事將
兵乏絕處見水土卒不盡飲不近水不盡餐不嘗食寬緩不
苛士以此愛樂爲用爲人長後臂其善射亦天性雖子孫他
人學者莫能及匈奴嘗號曰飛將軍元狩四年大將軍驃騎
將軍出塞令廣并於右將軍趙食其軍出東道回惑失道後
大將軍長史急責幕府上簿乃自到百姓聞之知與不知老

壯皆為垂泣廣子椒為代郡太守

段會宗字子松天水上邽人竟甯中為西域都護西域敬其

威信更盡還為沛郡太守以單于當朝徙為雁門太守數年

坐法免西域諸國上書願得會宗陽朔中復為都護後元延

中賜爵關內侯以上朔平府

季布楚人尚氣任俠為河東守孝文時人有言其賢者上召

欲以為御史大夫復有言其勇使酒難近至留邸一月見罷

季布進曰臣無功竊寵待罪河東陛下無故召臣此人必有

以臣欺陛下者今臣至無所受事罷去此人必有以毀臣者

夫陛下以一人之譽而召臣一人之毀而去臣臣恐天下有

識聞之有以窺陛下也上默然良久曰河東吾股肱郡故特

召君耳布辭之官

番係武帝時爲河東守言漕從山東而西歲百餘萬石更砥柱之險敗亡甚多而亦煩費若穿渠引汾溉皮氏汾陰下引河溉汾陰蒲阪下度可得五千頃五千頃故盡河壩棄地民芟牧其中耳今溉田之度可得穀二百萬石以上穀從渭上與關中無異而砥柱之東可無復漕天子以爲然發卒數萬人作渠田數歲河移徙渠不利田者不能償種久之河東渠田廢而穿渠引汾溉皮氏汾陰引河溉汾陰蒲阪今永濟河津榮河水利多本於係

田延年字子賓由齊徙陽陵以材略給事大將軍幕府霍光重之出爲河東太守選拔尹翁歸等以爲爪牙誅鉏豪強奸邪不敢發以選人爲大司農會議昌邑王事眾莫敢發言延年按劍廷叱羣臣卽日議決宣帝卽位封陽城侯

周堪字少卿齊人元帝擢堪爲光祿卿堪弟子張猛光祿大夫給事中大見信任宏恭石顯憚之數譖毀焉堪性公方自見孤立遂直道而不曲是歲夏寒日青無光恭顯及許史皆言堪猛用事之咎上左遷堪爲河東太守猛槐里令顯等專權日甚後三歲餘孝宣廟闕災其晦日有蝕之於是上召責諸前言日變在堪猛者下詔徵堪詣行在所拜爲光祿大夫秩中二千石領尙書事猛復爲太中大夫給事中而顯幹尙書五人皆其黨堪希得見疾瘖不能言而卒

蕭咸東海蘭陵人望之子也舉茂材累遷河東太守所居有

政迹數增秩賜金後至大司農終官

以上解州

孟舒嘗事趙王張敖高帝八年貫高等謀發詔捕敖羣臣有敢隨趙王罪三族惟田叔孟舒等十餘人赭衣自髡鉗隨敖

至長安敖事白得出進言叔等十人上召見與語漢廷臣無能出其右上悅盡拜爲郡守諸侯相舒爲雲中守及文帝初立召漢中守田叔問曰公知天下長者乎對曰臣何足以知之上曰公長者宜知之叔頓首曰故雲中守孟舒長者也是時舒坐寇大入雲中免上曰先帝置孟舒雲中十餘年矣虜常一入舒不能堅守無故士卒戰死者數百人長者固殺人乎叔叩頭曰夫貫高等謀發下明詔趙有敢隨張王者罪三族然孟舒自髡鉗隨王以身死之豈自知爲雲中守哉漢與楚相距士卒罷敝而冒頓來爲邊寇孟舒知士卒罷敝不忍出言士爭臨城死敵如子爲父以故死者數百人孟舒豈歐之哉是乃孟舒所以爲長者于是上曰賢哉孟舒復召以爲雲中守

魏尙槐里人爲雲中守其軍市租盡以饗士卒私養錢五曰一椎牛饗賓客軍吏舍人匈奴遠避不近雲中塞寇嘗一入尙率車騎擊之所殺甚眾坐上功首虜差六級削官後文帝以馮唐言令唐持節赦尙復以爲雲中守

辛慶忌字子眞狄道人少以父任所在著名成帝時執金吾數年坐小法左遷爲雲中太守復徵爲光祿勳仕至左將軍外國敬其威信卒官

常惠西河太守元狩四年大將軍青出定襄擊匈奴還吏卒無封者唯雲中太守遂成及惠受賞惠爵關內侯

杜延年字幼公南陽人周子明法律封建平侯宣帝卽位益戶二千三百爲西河太守治甚有名五鳳中徵入爲御史大夫卒謚曰敬侯

馮立上黨潞人成帝河平三年遷五原太守居職公廉甚有

治行

以上歸
授道

右前漢十八人

劉瓚字文理平原人遷太原太守郡有豪強中官親戚為百姓所患瓚深疾之到官收其魁帥殺之所藏匿主人悉坐伏誅桓帝徵詣廷尉以瓚宗室不忍致之於刑使自殺

臧旻臧洪父也有幹才達於政為漢良吏初為徐州從事辟司徒府為盧奴令冀州牧舉尤異遷揚州刺史丹陽太守轉拜長水校尉終太原太守所在有名

馮衍字敬通野王之孫幼有奇才王莽時諸公多薦舉之衍辭不仕著顯志賦以自勵更始時為狼孟長建武六年日食衍上書陳八事帝將召見眾共排之遂得罪西歸故郡以上太原

府

葛龔字元甫梁國甯陵人以善文記知名性慷慨壯烈勇力過人永初中舉孝廉拜蕩陰令州舉茂才為臨汾令居二縣皆有稱績著文賦碑誄書記凡二十篇

皇甫嵩字義真安定朝那人度遼將軍規之兒子也父節雁門太守嵩少有文武志介好詩書習弓馬初舉孝廉茂才為臨汾令父喪去官後平黃巾封槐里侯拜太尉卒贈驃騎將軍印綬以上平陽府

丁邯字叔春京兆陽陵人有高節正直不撓建武初舉孝廉不肯為尚書郎後拜汾陰令治有名跡遷漢中太守蒲州府

田邑字伯玉馮翊蓮勺人有大節涉學藝能善屬文更始初為上黨太守二年與行大將軍事鮑永狼孟長馮衍繕甲養

士扞衛并土而尤善馮衍及世祖卽位遣宗正劉延攻天井關邑連戰十餘合延不得進邑迎母弟妻子會鄧禹使積弩將軍馮愷將兵擊邑愷與延悉得邑母弟妻子後聞更始敗乃遣使詣洛陽獻璧馬降帝遣騎都尉弓里游諫大夫何叔武卽拜爲上黨太守屢以書招衍降衍不從丞孀張舒誘降涅城舒家在上黨邑悉繫之遣丞書曰張舒內行邪孽不遵孝友疏其父族外附妻黨已收三族將行其法能逃不自詣者舒也能夷舒宗者子也丞不答自是與邑有隙而丞衍後亦罷兵幅巾降邑遷漁陽太守未至官疾徵還爲諫議大夫卒

戴涉建武初爲上黨太守太行山中有劇賊涉聞鮑昱有智略乃就謁請署守高都長遂平羣賊

魏應字君伯任城人習魯詩閉門誦習不交僚黨舉明經弟子自遠方至著錄數千人肅宗甚重之時會京師諸儒於白虎觀講論五經同異使應專掌閒難明年出為上黨太守徵拜騎都尉卒

鄭渾字文公河南開封人興之子也建安中為左馮翊平山賊轉上黨太守渾為郡明禁令以發奸勤稼穡以勸農由是民安而盜賊止息性清素在公卒之日妻子不免饑寒

羊衡泰山南城人績之子也世有清德蔡邕以女妻之衡仕

至上黨太守生祐以上略

鮑昱上黨屯留人司隸校尉永子有智略建武初署高都長

討平羣盜道路開通澤州府

崔鈞博陵安平人烈子少交結英豪有名稱為西河太守獻

帝初與袁紹俱起兵山東討董卓

汾州府

蘇竟字伯况扶風平陵人平帝世以明易爲博士講書祭酒善圖緯能通百家之言王莽時拜代郡中尉時北邊擾亂民多懼禍竟終完輯一郡光武卽位就拜代郡太守使固塞以拒邊寇建武五年冬盧芳略得諸郡帝使偏將軍隨弟屯代郡竟病篤以兵屬弟詣京師謝罪拜侍中竟潛樂道術作記誨篇及文章傳於世年七十卒

李超爲代郡太守永建元年鮮卑寇郡超戰死

杜密字周甫潁川陽城人爲人沈質少有厲俗志爲司徒胡廣所辟稍遷代郡太守累官太僕黨事起免歸與李膺俱坐而名行相次故時人亦稱李杜焉後復爲太僕明年坐黨事被徵自殺

裴潛字文行河東聞喜人建安中代郡烏丸王及大人專制郡事前太守莫能治正以潛爲代郡太守單車之郡撫之以靜遂悉令還前後所掠誅郡中大吏通烏丸者十餘人北邊大震百姓歸心在代三年還爲丞相理曹掾入魏歷河南尹封清陽亭侯爲尙書令卒

以上大同府

郭涼字公文右北平人壯猛而通經書多智略從擊彭寵有功封廣武侯建武九年爲雁門太守與將軍杜茂擊盧芳將尹由於繁峙十二年尹由將賈丹霍匡解勝本雁門人共殺由詣涼上狀皆封爲列侯詔送委輸金帛賜茂涼軍吏及平城降民自是盧芳城邑稍稍來降涼誅其豪右郇氏之屬鎮撫羸弱旬月間雁門且平芳遂亡入匈奴帝擢涼子爲中郎宿衛左右

王澤字季道雁門太守有名稱

陳翔字子麟汝南邵陵人少知名善交結察孝廉太尉周景辟舉高第累遷定襄太守後坐黨事考黃門北寺獄以無驗見原卒於家

以上朔平府

劉祐字伯祖中山安國人察孝廉累遷河東太守時屬縣令長率多中官子弟百姓苦之祐到黜其權強平理冤結政爲三河表後爲河南尹陳寶敗黜歸卒於家

史弼字公謙陳留考城人少篤學爲平原相詔書下舉鈞黨獨無所上遷河東太守被一切詔書當舉孝廉弼知多權貴請託乃豫勅斷絕書屬中常侍侯覽果遣諸生齎書請之并求假鹽稅積日不得通生乃說以他事謁弼而因達覽書弼大怒曰太守忝荷重任當選士報國爾何人而僞詐無狀命

左右引出楚捶數百府丞掾史千餘人皆諫於廷弼不對遂
付安邑獄卽日拷殺之侯覽大怨遂詐作飛章下司隸誣弼
誹謗檻車徵吏人莫敢近者唯前孝廉裴瑜送到崑澗之間
大言於道旁曰明府摧折虐臣選德報國如其獲罪足以垂
名竹帛願不憂不懼弼曰誰謂荼苦其甘如薺昔人刎頸九
死不恨下廷尉詔獄減死罪一等論輸左校閉門不出數爲
公卿所薦議郎何休訟弼有幹國之材宜登台相徵拜議郎
爲彭城相卒

焦贲山陰人嘗爲河東太守鄭宏之師也

孔彪字元上孔子十九世孫也舉孝廉爲博陵太守再遷河
東太守未怒而懼不令而從海內歸公卿之任勞而不伐有
實若虛以病辭官建甯四年卒見漢碑又有孔宏者亦官河

東太守碑同時所立今不可見矣

王邑字文都北地涇陽人爲河東太守興平二年帝幸安邑

邑奉獻縣帛悉賦公卿以下封邑爲列侯

以上解州

韓仁由聞喜遷槐里令除書未到而卒熹平四年河南尹遣
吏祠以少牢豎石表言以旌其美碑題曰漢循吏稱其前在
聞喜經國以禮刑得中有子產君子云云

陳寔字仲弓潁川許人出於單微有志好學坐立誦讀司空
黃瓊辟選理劇補聞喜長旬月以期喪去官復再遷除太邱
長修德清靜百姓以安寔在鄉閭平心率物爭訟者歎曰甯
爲刑罰所加不爲陳君所短後三公每缺議者歸之中平四
年年八十四卒海內赴者三萬餘人刊石立碑謚爲文範先

生以上絳州

毛義字少節廬江人家貧以孝行稱爲安陽尉南陽人張奉慕其名往候之坐定而府檄適至以義守令義捧檄而入喜動顏色奉心賤之因辭去及義母卒去官行服數辟公府爲安邑令進退必以禮後舉賢良公車徵遂不至奉歎曰賢者固不可測往日之喜乃爲親屈也元和元年詔告廬江太守曰前安邑令毛義躬履遜讓比徵辭病酒潔之風東州稱仁書不云乎彰厥有常吉哉其賜義穀千斛常以八月長史存

問賜羊酒顯茲異行

解州次王邑後

廉范字叔度京兆杜陵人趙將廉頗之後也漢興以廉氏豪宗自苦陘徙焉范舉茂才遷雲中太守會寇大入塞烽火日通故事寇過五千人移書傍郡吏欲傳檄求救范不聽自率士卒拒之寇眾盛而范兵不敵會日暮令軍士各交縛兩炬

三頭燕火營中屋列寇遙望火多謂漢兵救至大驚待旦將退范乃令軍中蓐食晨往赴之斬首數百級寇自相駢藉死者千餘人由此不敢復向雲中後頻厯郡守世伏其好義成嚴爲雲中太守建光元年擊其至鞬兵敗力戰沒馬襄爲西河長史永平五年冬北部六七千騎入於五原塞遂寇雲中至原陽南部擊卻之襄赴救寇乃引去

宋漢字仲和以經行著名舉茂才四遷西河太守又爲度遼將軍立名節以威恩著稱拜大中大夫卒策曰宋漢清修雪白正直無邪前在方外仍統軍實懷柔異類莫匪嘉績戎車載戢邊人用甯子錄乃勳引登九列因病退讓守約彌堅將授三事未克而終朝廷愍悼恆其愴然詩不云乎華敏戎功用錫爾祉其令將相大夫會葬加賜錢十萬及其在殯以全

素絲羔羊之節焉

崔寔字子鎮涿郡安平人瑗子也舉至孝獨行明於政體吏
才有餘論當世便事數十條名曰政論指切時要言辯而確
當世稱之拜議郎遷大將軍冀司馬與邊韶延篤等著作東
觀出爲五原太守五原土宜麻枲而俗不知織績民冬月無
衣積細草而臥其中見吏則衣草而出寔至官斥賣儲待爲
作紡績織紝練縵之具以教之民得以免寒苦是時寇連入
雲中朔方殺略吏民一歲至九奔命寔整勵士馬嚴烽候寇
不敢犯常爲邊最先是瑗妻劉氏有母儀淑德博覽書傳及
寔在五原常訓以臨民之政寔之善績母有其助焉後拜尚
書稱疾免歸卒

耿秉字伯初大司馬國子以父任爲郎建初元年拜度遼將

軍視事七年匈奴懷其恩信徵爲執金吾章和二年封美陽侯永光三年卒諡曰桓侯

耿煜字季遇順帝初鮮卑寇緣邊殺代郡太守煜以烏桓校尉率諸部卒出塞討擊大破之自後頻出輒克獲威振北方遷度遼將軍

馬續字季則七歲能通論語博觀羣籍善九章算術順帝時爲度遼將軍所在有恩威稱

梁慄字伯威北地弋居人拜西域副校尉定龜茲永初三年冬南部與烏桓畔詔慄行度遼將軍事寇圍中郎將耿种於美稷連戰數月攻之轉急种移檄求救四年正月慄將八千餘人馳往赴之至屬國故城與南部左將軍烏桓大人戰破斬其渠帥殺三千餘人虜其妻子獲財物甚眾寇後將七八

千騎迎攻圍懂懂被甲奔擊所向皆破寇遂引還虎澤三月
行車騎將軍事何熙軍到五原曼柏暴疾不能進遣中郎將
龐雄與懂种步騎萬六千人攻虎澤連營稍前寇乞降懂大
陳兵受之會熙卒於師卽拜懂度寇將軍明年以擅授南部
侵孤塗奴羌侯印徵下獄校書郎馬融訟其功後起拜謁者
擊羌卒

种鬲字景伯洛陽人仲山甫之後也舉孝廉桓帝時遷使匈奴
中郎將後寇入并涼二州擢爲度遼將軍鬲到營所先宣
恩信誘降諸部其有不服然後加討羌虜先時有生兒獲質
於郡縣者悉遣還之誠心懷撫信賞分明由是羌胡龜茲莎
車烏孫等皆來順服鬲乃去烽燧除侯望邊方晏然無警入
爲大司農遷司徒卒并涼邊人咸爲發哀匈奴聞鬲卒舉國

傷惜單于每入朝賀望見墳墓輒哭泣祭祀

李膺字元禮潁川襄城人祖父修爲太尉膺性簡亢無所交接唯以同郡荀淑陳寔爲師友舉孝廉累官烏桓校尉以公事免永壽二年鮮卑寇雲中桓帝聞膺能乃復徵爲度遼將軍先是羌虜及疏勒龜茲數出攻鈔張掖酒泉雲中諸郡百姓屢被其害自膺到邊皆望風懼服先所掠男女悉送還塞下自是之後聲震遠域後再爲司隸校尉獨持風裁以名聲自高士有被其容接者名爲登龍門遭黨事免歸起爲長樂少府陳寶敗復廢張儉事起收捕鈞黨乃詣獄拷死

皇甫規字威明安定朝那人祖父稜度遼將軍規舉賢良方正對策梁冀忿其刺已以爲下第託疾免歸冀誅拜太山太守延熹四年爲中郎將討破羌零吾後徵拜度遼將軍至營

數月上書薦中郎將張奐以自代曰臣聞人無常俗而政有治亂兵無強弱而將有能否伏見中郎將張奐才略兼優宜正元帥以從眾望若猶謂愚臣宜充軍事者願乞宥官以爲奐副朝廷從之以奐代爲度遼將軍規爲使匈奴中郎將及奐遷大司農規復代爲度遼將軍規爲人多意算自以連在大位欲退身避第數上病不見聽會友人上郡太守王叟喪還規縞素越界到下亭迎之因令客密告并州刺史胡芳言規擅遠軍營公違禁憲當急舉奏芳曰威明欲避第仕塗故激發我耳吾當爲朝廷愛才何能中此子計耶遂無所問及黨事大起天下名賢多見染逮規雖爲名將素譽不高自以西州豪傑恥不得與乃自上言附黨宜坐朝廷知而不問時人以爲規賢在事數歲北邊威服永康元年徵爲尙書後封

壽成亭侯邑二百戶讓封不受再轉護羌校尉卒

橋元字公祖梁國睢陽人舉孝廉桓帝末鮮卑南部及高句

驪嗣子伯固並畔為寇鈔四府舉元為度遼將軍假黃鉞元

至鎮休兵養士然後督諸守討擊及伯固等皆破散退在職

三年邊境安靜後遷太尉

賈琮字孟堅東郡聊城人舉孝廉中平元年舉為交趾刺史

民歌賈父又為冀州刺史州界翕然靈帝後大將軍何進表

為度遼將軍卒於官以上歸綏道案度遼將軍治五原曼

其使匈奴中郎將治西河美稷亦在河套故職官表中皆不

列及茲探入宦積者以蒙古諸部濱河之地今薩拉齊托克

又度遼使匈奴諸將所部也

右後漢四十二人

鄭昌字次卿泰山剛人弟宏字稗卿亦好學皆明經通法律

政事次卿爲太原太守宏爲南陽太守皆著治蹟條教法度
爲後所述太原府

李孚字子憲本姓馮鉅鹿人建安中守解長名爲嚴能精斷
稍遷司隸校尉終平陽太守

吉茂字叔暢馮翊池陽人建安中舉茂才除臨汾令居官清
淨吏民不忍欺轉爲武德侯庶子景初中卒茂脩行從少至
長室如縣磬饋遺一不肯受

徐邈字景山燕國薊人黃初中歷平陽太守所在著稱封都
亭侯官至司空嘉平初卒諡曰穆朝廷追思清節之士詔曰
夫顯賢表德聖王所重舉善而教仲尼所美故司空徐邈征
東將軍胡質衛尉田豫皆服職前朝歷事四世出統戎馬入
贊庶政忠清在公憂國忘私不營產業身沒之後家無餘財

朕甚嘉之其賜魏等家穀二千斛錢三十萬布告天下

賈逵字梁道襄陵人初爲郡吏守絳邑長有賢聲郭援之攻河東所經城邑皆下逵堅守援召單于急攻之城將潰絳父老與援要不相害逵絳人旣潰援聞逵名欲使爲將以兵劫之逵不爲動左右引逵使叩頭逵叱之曰安有國家長吏爲賊叩頭援怒將斬之絳吏民皆乘城呼曰殺我賢君甯俱死耳左右義逵多爲請遂得免初逵過皮氏曰爭地先據者勝圍急知不免乃使人間行送印綬歸郡且曰急據皮氏援旣并絳眾將進兵逵乃以他計疑援謀人祝奧援由是留七日郡從逵言故得無敗仕至豫州刺史

以上平陽府

嚴幹字公仲馮翊東縣人以孝廉拜蒲坂令病去官後追錄

前討郭援功封武鄉侯

游楚馮翊人爲蒲阪令性慷慨以恩德爲治不好刑殺遷漢興太守

徐英馮翊人爲蒲阪令剛爽不撓嘗鞭小吏張旣後貴顯

欲與英和解乃因醉狎之英抗志不納遂不用

以上蒲州府

牽招字子經安平觀津人袁紹辟爲督軍從事建安九年紹子尙遣至上黨督致軍糧未還而鄴破時尙外兄高幹爲并州刺史招以并州左有恆山之險右有大河之固帶甲五萬北阻彊胡勸幹迎尙并力觀變幹旣不能從而陰欲害招招聞之問行去道隔不得追遂東詣魏武仍辟冀州從事魏黃初中爲雁門太守郡在邊陲雖有候望之備而寇鈔不斷招旣教民戰陣又表復烏丸五百餘家租調使備鞍馬遠遣偵候寇每犯塞勒兵逆擊來輒摧破吏民膽氣日銳荒野無虞

又構間離散使更相猜疑鮮卑大人步度根泄歸泥等與軻
比能爲隙將部落三萬餘家詣郡附塞勅令還擊比能殺比
能弟苴羅侯及叛烏丸歸義侯王同王寄等大結怨讐招遂
自出率歸泥等討比能於雲中故郡大破之招通河西鮮卑
附頭等十餘萬家繕治陁北故上館城當作下館置屯戍以鎮內
外夷人大小莫不歸心諸叛亡雖親戚不敢藏匿咸悉收送
於是野居晏閉寇賊靜息乃簡選有才識者詣太學受業還
相授教數年中庠序大興又鑿原開渠注水城內民賴之大
和初賜爵關內侯二年護烏桓校尉田豫出塞爲軻比能圍
於故馬城招整勅兵馬欲赴救并州以常憲禁之招謂節將
見圍不可拘於吏議自表輒行又竝馳布羽檄寇恐怖軍到
故平城便皆潰走招在郡十二年卒官威風遠振其治邊之

稱埒于出豫百姓追思之

傅容漁陽人繼牽招爲雁門太守有名績

以上代州

杜畿字伯侯京兆杜陵人舉孝廉建安中高幹舉兵并州河東太守王邑被徵河東人衛固范先外以請邑爲名而內實通幹魏武謂荀彧曰河東被山帶河四鄰多變當今要地也君爲我舉蕭何寇恂以鎮之彧曰杜畿勇足以當大難智能應變乃其人也於是迫拜畿爲河東太守固等使兵絕陝津彧謂畿曰宜須大兵畿曰河東有三萬戶非皆欲爲亂也今兵迫之急欲爲善者無主必懼而聽於固固等勢專必以死戰討之不勝四隣應之天下之變未息也討之而勝是殘一郡之民也且固等未顯絕王命外以請故君爲名必不害新君吾單車直往出其不意固爲人多計而無斷必僞受吾吾

得居郡一月以計糜之足矣遂詭道從涇津度范先於門下
斬殺主簿已下三十餘人畿舉動自若固曰殺之無損徒有
惡名遂奉之畿謂衛固范先曰衛范河東之望也吾仰成而
已然君臣有定義成敗同之大事當共平議以固爲都督行
丞事領功曹將校吏兵三千餘人皆范先督之固等喜雖陽
事畿不以爲意固欲大發兵畿患之說固曰今大發兵眾必
擾不如徐以貲募兵固遂爲貲調發數十日乃定又入喻固
等曰人情顧家諸將掾吏可分遣休息固等惡逆眾心又從
之於是善人陰爲援惡人分散固等密調兵未至畿知諸縣
附已因出是張壁拒守固等與幹晟共攻畿不下遂敗固等
伏謀黨與皆赦之使復其居業時郡縣皆殘破河東最先定
少耗滅畿治之崇寬惠與民無爲嘗詞訟有相告者畿親見

爲陳大義遣令歸諱思之若意有所不盡更來詣府鄉邑父老自相責怒曰有君如此奈何不從其教自是少有詞訟班下屬縣舉孝子貞婦順孫復其徭役隨時慰勉之漸課民畜特牛草馬下逮雞豚犬豕皆有章程百姓勸農家家豐實畿乃曰民富矣不可不教也於是冬月修戎講武又開學宮親自執經教授郡中化之韓遂馬超舉兵河東雖接境民無異心魏武西征至蒲阪與敵夾渭爲軍軍食一仰河東及敵破餘粟二十餘萬斛下令曰河東太守杜畿孔子所謂禹吾無間然矣增秩中二千石魏武征漢中遣五千人運運者自卒勉曰人生有一死不可負我府君終無一人逃亡其得人心如此魏國建入爲尙書事平更令曰昔蕭何定關中寇恂平河內卿有其功間將授卿以納言之職願念河東吾股肱之

郡充實之所足以制天下故且煩卿臥鎮之畿在河東十六年常爲天下最魏初封豐樂亭侯爲尙書僕射試船陶河沒贈太僕諡曰戴畿初在郡被書錄寡婦畿但取寡者故所送少及趙儼代畿而所送多文帝問畿前君所送少今何多也畿對曰臣前所錄皆亡者妻今儼送生人婦也帝爲失色子恕嗣官幽州坐事免後河東樂詳年九十條上書頌畿之遺績朝廷感焉詔復封孫預爲豐樂亭侯

任嘏字昭先樂安博昌人文帝時累遷河東太守所在化行有遺風餘教嘏爲人滄粹凱弟沈默潛行著書三十八篇卒後故吏河東上官崇等奏之詔下祕書以貫羣言

杜恕字務伯京兆杜陵人畿子明帝末爲河東太守歲餘遷淮北都督恕所在務存大體而已其樹惠愛得百姓歡心不

及於畿而推誠以質專心向公在朝論議類皆伉直以上解州

右三國魏十三人

劉敞字長升東萊掖人毅子正直有父風爲侍御史劾司徒王渾郭彰嘗曰我能截君角敞勃然曰天子法官而欲截角乎求紙筆奏之彰不敢言遷太原內史趙王倫之亂假征虜將軍不受與三王共舉義倫誅入爲左丞終右光祿大夫太子少傅散騎常侍後勅王彌曹疑歸正遇害

荀藐或云浪武帝時爲榆次令爲政以德懷民時鳳集其境武帝下詔褒美云就之如日月敬之如神明愛之如父母樂之如時雨今縣南有荀政鄉藐去民思之故云以上太原府

李重字茂曾江夏鍾武人太熙中爲行討虜護軍平陽太守崇德化修學校表篤行拔賢能清簡無欲正身率下在職三

年彈黜四縣弟疑亡表去官永康初趙王倫用爲相國左司馬以憂卒家貧宅宇狹小無殯斂之地詔典客署營喪追贈散騎常侍諡曰成

李矩字世迴平陽人封東明亭侯爲平陽郡督護後鄉人推爲塢主愍帝時領河東平陽太守饑饉相仍又多疫癘矩垂心撫恤百姓賴焉會長安羣盜東下所在多虜掠矩遣部將擊破之盡得賊所略婦女千餘人諸將以爲非矩所部欲盡留之矩曰俱是國家臣妾焉有彼此乃一時遭之後至魯陽

墜馬卒

以上平陽府

呂溫壽張人善書好施有文武才略拜上黨太守以能稱卒贈豫州刺史

郭翼直言上書武帝擢爲屯留令元帝時南昌熊遠疏論時

政嘗稱引之以上潞安府

賈渾太安中為休介令劉元海遣將喬晞攻陷之渾抗節不降曰吾為晉守不能全之豈苟求生以事賊何面目以視息世間哉晞怒執將殺之晞將尹崧曰將軍舍之以勸事君晞不聽遂害之汾州府

曹志字允恭譙國譙人陳思王植之子也少好學以才行稱襲爵改濟北晉初降鄆城縣公詔曰前濟北王曹志履德清純才高行潔好古博物為魏宗英朕甚嘉之其以志為樂平太守志在郡上書以為宜尊儒重道請為博士置吏卒後為散騎常侍卒諡定

焦球為樂平太守劉琨遣攻常山斬其太守邢泰以上平定州

索靖字幼安敦煌人舉賢良方正對策高第擢尚書郎靖草

書與尚書令衛瑾齊名號一臺二妙在臺積年除雁門太守
太安末拜使持節監洛城諸軍事與賊戰大破之靖亦被傷
而卒贈司空封安樂亭侯諡曰莊

王據劉琨署雁門太守及琨奔段匹磾被拘據與匹磾所署
代郡太守辟閭嵩後將軍韓據連謀密作攻具欲襲匹磾事
覺及嵩俱被害以上代州

劉原渤海人河東太守好奇以旌才爲務郡人馮收薦猗氏
王接於原原卽加禮命接以母老辭乃止

鄧攸字伯道平陽襄陵人河東太守

路述爲河東太守劉淵寇河東述戰死以上解州

摯虞字仲洽京兆長安人少事皇甫謐才學通博著述不倦
武帝詔諸賢良方正直言會東堂親策之虞對切直擢太子

舍人除聞喜令時天子留心政道又吳寇新平天下乂安虞
上大康頌以美晉德以母憂解職惠帝末歷光祿勳太常卿

卒

絳州

右晉十五人

吳平仁定陽令高祖時穆鵠鎮汾州以平仁與吐京太守劉
升爲吏民所懷並爲表請高祖皆從焉自是守令咸自砥礪

平陽府

薛謹河東汾陰人彊孫也父辯將歸國謹自彭城來奔朝廷
嘉之授河東太守後襲爵平西將軍汾陰侯謹所治與屈丐
連接結士抗敵甚有威惠始光中詔奚斤伐赫連昌敕謹領
偏師前鋒鄉導旣克蒲坂世祖以新舊之民并爲一郡謹仍
爲太守將軍如故詔與鎮南將軍奚眷討平山胡白龍除安

西將軍涪陵公刺史如故太延初征吐沒骨平之謹自郡遷州威惠兼備風化大行時兵荒之後儒雅道息謹命立庠序教以詩書三農之暇悉令受業躬巡邑里親加考試於是河汾之地儒道興焉真君元年徵還京師五年以北討後期斬尋贈鎮西將軍秦雍二州刺史諡元

元淑河東郡守也民謠曰秦州河中杼柚代春元公至止田疇始理

崔遊字延叔博陵安平人少有風概釋褐奉朝請熙平末轉河東太守郡有鹽戶常供州郡爲兵子孫見丁從役遊矜其勞苦乃表聞請聽更代郡內感之太學舊在城內遊乃移置城南閑敞之處親自說經當時學者莫不勸慕號爲良守後除南秦州刺史爲城人所害以上蒲州府

刁雙字子山渤海饒安人少好學兼涉文史雅爲中山王英所知賞拜西河太守正光初中山王熙之誅也熙弟略投命於雙雙護之靈太后反政知略因雙獲免徵拜光祿大夫

劉升高祖時吐京太守在郡甚有威惠限滿還都民八百餘人詣鎮將穆羆請留羆以吏民懷之爲表請詔從焉以上汾州府

裴仲規河東聞喜人咸陽王禧爲司州牧辟主簿仍表行建興郡事車駕自代還洛次於郡境仲規備供帳朝於路側高祖詔仲規曰朕開置神畿郡望崇重卿旣首應司隸美舉復督我名邦何能自致也仲規對曰陛下窮神盡聖應天順民棄彼元壤來宅紫縣臣方罄心力躍馬吳會冀功銘帝籍勳書王府豈一郡而已高祖笑曰冀卿必副此言車駕達河梁見咸陽王謂曰昨得汝主簿爲南道主人六軍豐贍元弟之

寄殊副所望後征義陽戰沒贈河東太守諡貞

裴衍字文舒河東聞喜人叔業兄子歸魏歷建興太守又歷河內廉貞寡欲善撫百姓二郡人吏追思之後封臨汝縣公

仕至相州刺史北道大都督討葛榮見害

以上澤州府

韋崇字洪基京兆杜陵人寓居河洛高祖納其女爲充華嬪除南潁川太守不好發摘細事郡中大治頻居中正以平直見稱出爲鄉郡太守更滿應代吏民詣闕乞留復延三年在郡凡九年轉司徒諮議久之卒

沁州

楊津雲中平城人肆州太守性孝友涖官勤慎巨細必親屢立戰功不妄殺降人咸稱其仁

忻州

閻慶允爲敷城太守歲儉常以家粟千石振恤人賴以濟部人陽寶龍一千餘人申頌美政有司以聞靈太后卒無褒賞

案本傳為東秦州敷城郡今陝之雞川地非晉州肆州之屬郡也此沿舊志誤列肆州附訂

梁越新興人博通經傳道武以其謹厚遷上大夫令授諸皇子經書明元初以師傅恩封祝阿侯出為雁門太守獲白雀以獻拜光祿大夫

代州

薛引字甯宗拔子少有父風太和六年襲爵鎮西大將軍河東公例降侯除立忠將軍河北太守郡帶山河路多盜賊有韓馬兩姓各二千餘家恃疆憑險最為狡害劫掠道路侵暴鄉閭引至郡之日即收其奸魁二十餘人一時戮之於是羣盜懾氣郡中清肅二十三年卒於郡謚敬

柳崇字僧生河東解人方雅有器量兼有學行舉秀才射策高第為尚書右外兵郎中時河東河北二郡爭境其間有鹽池之饒虞坂之便守宰及民皆恐外割公私朋競紛囂臺府

高祖遣崇檢斷官民息訟遷本郡邑中正又領邑中正出爲河北太守崇初屆郡郡民張明失馬疑十餘人崇見之不問賊事人人別借以溫顏更問其親老存不農桑多少而微察其辭色卽獲正賊呂穆等二人餘皆放遣郡中畏賜境內帖然卒於官諡穆

裴夙字買興河東聞喜人沈雅有器識爲河北太守以忠恕接下百姓感之卒於郡

以上解州

陸凱字智君馥子好學除正平太守在郡七年號爲良吏卒諡惠

絳州

裴慶孫聞喜人正光末汾州吐京郡部聚黨作逆慶孫擊之大潰後復雁集北連蠡升南通絳蜀凶徒轉盛慶孫又討之至汾陽城朝廷以此地披山帶河衿要之所遂立郡因以慶

孫爲太守假節輔國將軍州

右後魏十六人

李遠字萬歲家高平幼有器局周太祖令居麾下封安定縣伯進公又進陽平郡公時河東初復民情未安太祖謂遠曰河東國之要鎮非卿無以撫之乃授河東郡守遠敦獎風俗勸課農桑肅遏姦匪兼修守禦之備會未朞月百姓懷之太祖嘉焉降書勞問徵爲侍中後除尙書左僕射周孝閔踐阼以子植謀誅晉公護護逼令自殺護誅諡曰忠

韓果代武川人少善騎射被甲荷戈升陟峰嶺猶涉平路所行之處山川形勢備能記憶兼善伺敵虛實有潛匿溪谷者果登高望之所疑慮往必有獲由是爲虞侯都督遷朔州刺史大統九年除河東郡守從大軍破稽胡於北山胡地險阻

人迹罕至果進兵窮討散其種落稽胡憚果勁健號爲著翅人周太祖聞之笑曰著翅之名甯滅飛將封褒中郡公周武成二年又率軍破稽胡大獲生口賜奴婢一百口建德初卒

以上蒲州府

裴俠字高和河東解人從孝武入關除河北郡守俠躬履儉素愛民如子所食唯菽麥鹽菜而已吏民莫不懷之此郡舊制有漁獵夫三十人以供郡守俠曰以口腹役人吾所不爲也乃悉罷之又有丁三十人供郡守役使俠亦不以入私並收庸直爲官市馬歲月旣積馬遂成羣去職之日一無所取民歌之曰肥鮮不食丁庸不取裴公貞惠爲世規矩俠嘗與諸牧守俱謁周太祖太祖命俠使別立謂諸牧守曰裴俠清慎奉公爲天下之最今眾中有如俠者可與之俱立眾皆默

然無敢應者太祖乃厚賜朝野歎服號爲獨立君九年入爲
大行臺郎中周武成元年卒於工部中大夫贈蒲州刺史諡
貞河北郡前功曹張回及吏民等感俠遺愛乃作訟紀其清
德焉

張軌字元軌濟北臨邑人少好學志識開朗杖策入關封壽
張縣子大統六年爲河北郡守在郡三年聲績甚著臨人治
術有循吏之美宰人者多推尚之章武公導出鎮秦州爲長
史加撫軍將軍大都督卒惟有素書數百卷諡質以上解州

裴果字戎昭河東聞喜人少慷慨有志略周太祖曾使并州
與果相遇果知非常人密託附焉永安末從軍討羣賊乘黃
驄馬衣青袍每先登陷陣時人號爲黃驄年少永熙中授河
北郡守沙苑之役率宗黨歸西魏解玉壁圍摧鋒陷擊所向

披靡除正平郡守正平果本郡也以威猛爲政百姓畏之盜賊亦爲之屏息歷牧數州號爲稱職卒諡質州

右西魏五人

封子繪字仲藻渤海蓀人隆之子也太昌中從定并汾肆數州平爾朱兆及山胡等孝靜初從征夏州二年除衛將軍平陽太守晉州北界霍山舊號千里徑山坂高峻每大軍往來士馬勞苦子繪啟齊高祖請於舊徑東谷別開一路高祖從之仍令子繪領汾晉二州夫修治旬日而就高祖親總六軍路經新道嘉其省便賜穀二百斛後大軍討復東雍平柴壁及喬山紫谷絳蜀等子繪恆以太守前驅慰勞徵兵運糧軍士無乏四年西討爲大都督領冀州兵從高祖自滏口西趨并州會大軍於玉壁及師還晉陽引入內室而受密旨銜命

山東安撫州郡河清三年卒諡簡

平陽府

右東魏一人

王暕字叔朗北海劇人六世祖猛家於華山之鄆城暕淹雅有器度好學不倦隨神武到晉陽補中外府功曹參軍帶常山王演友齊天保初行太原郡事濟南立常山王從駕除暕并州長史王還并除丞相府司馬暕性閒淡寡慾雖王事執掌而雅操不移在并州戎馬填閭未嘗以世務為累良辰美景嘯咏遨遊登臨山水以談讌為事人士謂之物外司馬嘗詣晉祠賦詩忽有相王使召暕不時至後仕至儀同三司隋初卒於洛陽

太原府

房豹字仲幹東清河繹幕人體貌開岸美音儀河清中除謁者僕射拜西河太守地接周境俗雜稽部豹政貴清靜甚著

聳績歷博陵樂陵二郡齊滅還本鄉邱園自養屢被徵命固辭以疾終於家

汾州府

右北齊二人

王雅字度容蘭熙新固人世宗初除汾州刺史勵精爲治人庶悅而附之自遠至者七百餘家終夏州刺史

王慶祁縣人少敏悟有才略以戰功賜爵始安縣男歷丹中

二州刺史轉汾州爲政嚴明人莫敢犯

以上平陽府

柳帶韋字孝孫解人少好學與諸父慶虬檜歸西魏廢帝元年爲解縣令二年加授驃騎將軍左光祿大夫明年轉汾陰令發摘奸伏百姓畏而懷之周建德五年陳王純出并州以帶韋爲并州司會并州總管府長史六年卒於位謚愷

蒲州府

裴文舉字道裕河東聞喜人父遼爲州里推挹大統三年東

魏來侵遂乃糾合鄉人分據險要以自固時東魏以正平爲東雍州遣其將司馬恭鎮之每遣間人扇動百姓遂密遣都督韓僧明入城喻其將士卽有五百餘人許爲內應期日未至恭知之乃棄城夜走因是東雍遂內屬及李弼略地東境遂爲之鄉導多所降下周太祖嘉之時賞衣服封澄城縣子除正平郡守卒於官文舉少忠謹涉獵經史周初襲爵保定三年遷絳州刺史遠之往在正平也以廉約自守每行春省俗單車而已及文舉臨州一遵其法百姓美而化之總管韋孝寬特相欽重每與談論不覺膝前於席天和初晉驃騎大將軍開府儀同三司尋爲孝寬柱國府司馬六年進公初文舉叔父季和爲曲沃令卒於聞喜川而叔母韋氏卒於正平縣屬東西分隔韋氏墳隴在齊境及文舉在本州每加賞募

齊人感其孝義潛相要結以韋氏柩西歸竟得合葬宣政元

年卒

絳州

右北周四人

辛公義狄道人開皇中爲并州刺史下車先至獄中露坐驗問獄囚十餘日斷決殆盡方還受訟皆不立文案訊問不盡應須禁者公義卽宿廳事或諫曰君何自苦也答曰刺史無德令百姓繫於囹圄豈有禁人在獄而心自安乎罪人聞之咸自嘆服後訟者多兩讓而止

郭湛大業中祁縣令時縣人張道源以孝稱湛改其所居曰

復禮鄉至孝里

以上太原府

楊處綱高祖族父開皇初襲封義城縣公在官彊濟爲時所稱拜蒲州刺史吏民悅之卒諡恭

楊宏字辟惡高祖從祖弟開皇初封河間郡王進位上柱國拜蒲州刺史得以便宜從事時河東多盜賊民不得安宏奏爲盜者百餘人投之邊裔州境帖然號良吏每晉王廣入朝宏輒領揚州總管及晉王歸藩宏復還蒲州在官十餘年風教大治大業初徵還拜太子太保卒追封郇王

楊尙希宏農人高祖拜度支尙書進爵爲公尙希性宏厚兼以學業自通有雅望爲朝廷所重上每旦臨朝日昃不倦尙希諫以宜舉大綱繁務非所宜親上懼然曰公愛我尙希素有足疾上謂曰蒲州出美酒足堪養病屈公臥治之於是出爲蒲州刺史在州甚有惠政復引漢水立隄防開稻田數千頃民賴其利

堯君素魏郡湯陰人大業末累拜鷹擊郎將從驍衛大將軍

屈突通拒唐兵於河東俄而通引兵南遁以君素有膽略署
領河東守唐師攻之不克遣通至城下呼之君素歔歔流涕
悲不自勝左右皆哽咽通亦泣下言宜早降君素曰公當瓜
牙之寄爲國大臣國祚隆替懸之於公奈何不思報效以至
於此通曰我力屈而來君素曰方今力猶未屈何用多言通
慙而退時圍甚急行李斷絕乃爲木鵝置表於頸具論事勢
浮之黃河沿流而下河陽守者得之達東都越王侗見而歎
息承制拜金紫光祿大夫密遣行人勞苦之監門直閤龐玉
武等歸唐俱造城下爲陳利害又賜金券待以不死君素卒
無降意其妻又至城下謂之曰君何自苦身取禍敗君素曰
天下事非婦人所知引弓射之應弦而倒君素善於統領堅
守歲餘糧食乏絕又微知江都狀遂爲左右所害

辛仲龕狄道人為猗氏令温厚不苛祀名宦以上蒲州府

柳昂字千里河東解人隋初潞州刺史昂見天下無事可以

勸學行禮因上表言之上覽而嘉納詔天下州縣皆置博士

習禮焉昂在州甚有惠政數年卒官

辛彥之隴西狄道人隋初封任城郡公累遷潞州刺史有惠

政卒於官諡曰宣以上潞安府

蕭大圖梁簡文帝之子也幼而聰敏神情俊悟梁大寶元年

封樂梁郡王侯景肆虐潛逃獲免隋開皇初拜內史侍郎出

為西河郡守性好學務於著述撰梁舊事三十卷寓記三卷

士喪儀注五卷文集二十卷

韋冲字世冲京兆杜陵人世為關右著姓高祖踐阼賜爵安

固侯長城之役發南汾州部眾千餘人在塗皆亾上以冲嘗

安集稽部呼沖問計沖曰臣請以理綏靜不勞用兵而定上然之因命沖綏懷叛者月餘皆至並赴長城上下書勞勉之尋拜石州刺史甚得諸部歡心以母憂去職仁壽中卒

楊子崇高祖族弟少好學有風儀恆典宿衛從幸汾陽宮屢請早還不納尋有雁門之役出爲離石郡太守治有能名捕獲羣盜數千人太原兵至城陷爲讐家所殺

汾州府

伊婁謙字彥恭其先隨魏南遷周建德五年聘齊被拘留武帝平齊累封濟陽侯隋初進公出爲澤州刺史清約自處甚得人和以疾去官吏人攀戀行數百里不絕

張虔雄清河東武城人大業中爲陽城縣令有治績

以上澤州府

李克開皇中爲朔州刺史有威名

王仁恭字元實天水上邽人仁壽中歷驃騎將軍從楊素擊

平漢王諒進大將軍拜呂州刺史突厥寇邊詔以本官領馬
邑太守始畢率騎數萬寇馬邑復令二特勒將兵南過時郡
兵不滿三千仁恭簡精銳逆擊破之獲數千級並斬二特勒
其後突厥復入定襄仁恭率兵四千掩擊之斬千餘級大獲
六畜而還尋爲校尉劉武周所害

字文弼字公輔洛陽人慷慨有大節博學多能歷朔州刺史

楊廓大業中爲朔州刺史煬帝北巡過代州邱和獻食甚精

至朔州廓獨無所獻

以上朔平府

王頌字景彥太原祁人性至孝有文武幹局開皇中以平陳

功拜代州刺史甚有惠政

代州

韋世康京兆杜陵人高祖授絳州刺史以雅望鎮之闔境清
肅性恬素好古不以得喪干懷在州嘗慨然有止足之志與

子弟書道意諸弟報以事恐難遂乃止在任數年有惠政奏
課連最擢禮部尙書進爵上庸郡公終荊州都督贈大將軍
諡文

于璽字伯符周上柱國翼子開皇中爲汴州刺史有能名爲
邵州刺史加上大將軍黎陽郡公在州數年甚有恩惠後檢
校江陵總管州人張願等數千人詣闕上表請留璽上嘉歎
良久令還邵州父老相賀卒于熊州刺史諡曰靜

陳叔達字子聰陳宣帝子大業中爲絳郡通守受學於文中
子叔達下捕賊之令曰無急也請自新者原之以觀其後文
中子聞之曰陳守可與言政矣叔達嘗謂薛收曰吾行令於
郡縣而盜不止夫子居於鄉里而爭者息何也收曰此以言
化彼以心化叔達曰吾過矣退而靜居三月盜賊出境文中

子聞之曰收善言叔達善聽後仕唐爲黃門侍郎判納言諡忠王疑嘗以文中子傳屬之

梁軌開皇間爲臨汾令開鼓堆泉十二渠以溉民田利甚溥

民歌頌之爲立祠渠旁

以上絳州

周法尙汝南成安人陳總督江州刺史炅次子果勁有風概好讀兵書爲定襄太守煬帝幸榆林內史令元壽請御營外分二十四軍法尙曰結爲方陣四面外拒六官及百官家口並在其間車騎爲壁壘此與據城何異若戰而捷抽騎追奔或戰不利屯營自守帝善之道

歸綏

右隋二十四人

張知泰蒲州河東人舉明經神龍中累拜御史封漁陽郡公以忤武三思出爲并州刺史天兵軍使仍帶本官尋徙魏州

卒諡定

杜暹濮州濮陽人舉明經開元十四年同平章事未幾罷累轉太原尹二十年上幸北都晉戶部尙書許扈蹕還封魏縣侯卒贈尙書右丞相諡貞孝暹公清勤約不通獻遺所至以廉幹聞

韋濟鄭州武陽人隨右河西黜陟使恆子也開元中爲太原尹製先德詩四章述祖父之行辭致高雅天寶中爲尙書左丞濟從容雅度所蒞人推善政終馮翊太守

路審中徐州吏龐賊之亂著奇節累擢嵐州刺史鄭畋謂其節貫神明請擢爲右羽林將軍詔可

劉文靜字華仁京兆武功人大業末爲晉陽令與晉陽宮監裴寂善高祖鎮太原深自結託後坐李密姻屬繫秦王入禁

所視之文靜曰太原百姓避盜者皆入此城文靜爲令數年知其豪傑可得十萬人尊公所領兵復且數萬君言出口誰敢不從秦王笑曰君言正合人意文靜遂介寂以交高祖叱左右執斬王威高君雅大將軍府建爲軍司馬又轉大丞相府司馬使突厥始畢始畢卽遣二千騎隨文靜至又獻馬千匹高祖喜曰非君何以致之尋敗彘顯和執屈突通進授光祿大夫封魯國公唐初拜納言後民部尙書領陝東道行臺左僕射

溫大有字彥將太原祁人義旗初舉高祖引爲太原令從秦王狗西河將行高祖曰士馬單少須要經略以君參軍事事之濟否卜是行也西河下攝大將軍府記室武德元年累轉中書侍郎卒諡敬

狄惟謙梁公仁傑之後也會昌中爲北都晉陽令守官清恪
不畏疆禦屬邑境亢陽自春徂夏數百里田皆耗斃禱於晉
祠略無其應時有郭天師本并州女巫少攻符術多行厭勝
監軍使攜至京國因緣中貴出入宮掖遂賜天師號旋歸本
土僉曰若得天師一至晉祠則不足憂矣惟謙請於天師初
甚難之旣而敦請主帥遂親往迓焉巫者唯唯乃具車與列
旛蓋惟謙躬爲控馬旣至祠所盛設供帳罄折庭中翌日語
惟謙曰我爲爾飛符上界請雨已奉天帝命必在至誠三日
雨當足矣由是四郊士庶雲集期滿無徵又曰災沴所興良
由縣令無德我爲爾再告天七日方合有雨惟謙引罪奉之
愈謹竟無其效乃驟欲入州復拜留曰天師已爲萬姓來更
乞爲至心祈請悖然而晉曰庸瑣官人不知天道天時未肯

下雨留我將復奚爲乃謝曰非敢更煩天師候明相餞耳於是宿戒左右我爲巫者所辱豈可復言爲官耶請且有所指揮汝等咸須相稟是非好惡余自當之迨曉時門未開郭已嚴飾歸騎而狄酒榼供設一無所施郭乃坐堂中大恣呵責惟謙遂曰左道女巫妖惑日久當須斃在此耳焉敢言歸叱左右於神前鞭背二十投於漂水祠後有山高可十丈遽命設席焚香從吏悉皆放還簪笏立其上於是闔城駭愕云邑長杖殺天師馳走紛紜觀者如堵時沙石流爍忽起片雲大如車蓋先覆惟謙立所四郊雲物會之雷震數聲甘雨大澍原野滂流土庶數千自山擁惟謙而下州將以殺巫者初亦怒之旣而精誠感應深加歎異表列其事詔書褒異仍賜錢五十萬

孫湛貞觀中爲榆次令引洞澗水西流溉田民利之政以嚴稱吏不敢犯

鄧義高宗時爲祁縣令有異政邑人刻石頌之

戴謙爲文水縣令開元二年於縣東北五十里鑿甘泉渠二十五里鑿蕩沙渠又鑿靈長渠千畝渠俱引文谷水傳溉田數千頃

安庭堅開元中爲太谷令有德政邑人立碑以紀之

李殷爲太谷令北京尹上言殷釐務公廉以德化下獄無囚繫刑無鞭扑薪水之事不擾於民力賦與之數不失於公程三時勸農躬行田井乾餽曝徹裏行而食一邑熙熙長幼有序流者歸復如戀父母今考秩垂滿眾情願留敢希明恩重令治任詔下褒美量留一年

楊仲續爲祁令甚有德惠人爲立祠

崔衍字著深州安平人太子賓客倫子天寶末擢明經爲清源令勸民力田懷拊流亡觀察使馬燧表其能徙美原累遷

宣歙池觀察使

以上太原府

李寬永徽二年爲晉州刺史於臨汾縣東二十五里夏柴堰引潁水溉田

尹思貞京兆長安人舉明經長安中累遷秋官尚書以忤張昌宗再徙晉州刺史前後爲十三州刺史皆以清簡爲政奏課連最封天水郡公遷御史大夫卒贈黃門監諡簡

魏知古深州陸澤人第進士神龍中授晉州刺史累遷同中書門下三品爲侍中封梁國公罷政使卒諡曰忠宋璟聞而嘆曰叔向古遺直子產古遺愛兼之者其魏公乎

蕭至忠沂州人祕書丞少監德言孫神龍中拜黃門侍郎同平章事遷侍中中書令景雲初出爲晉州刺史甚有能名馭馭遣大臣來朝見至忠風采逸巡畏俯謂人曰是宜入相何乃居外乎先天二年復爲中書令

齊澣字洗心定州義豐人第進士釋褐蒲州司法參軍有父子連坐論死者澣曰條落則本枯奈何俱死議貸其父太守不聽固爭卒原之歷遷吏部侍郎後爲李林甫所惡廢歸天寶五載起爲平陽太守以黃老清靜爲治卒於官肅宗時贈禮部尙書

房琯字次律河南人融子天寶十五載拜同平章事肅宗初自請將兵誅寇孽詔加持節招討西京兼防禦蒲潼兩關兵馬節度等使坐賀蘭進明譖貶上元元年出爲晉州刺史唐

儒多言瑄德器有王佐才云

李愬晟子德宗初爲晉州刺史以治異等加金紫光祿大夫
後以平蔡功累進尙書左僕射同中書門下平章事

裴向字依仁河中河東人遵慶子德宗未選爲太原少尹召
見諭旨尋用爲行軍司馬御史中丞改汾州刺史轉鄭州又
復爲太原少尹兼河東節度副使改晉州刺史充本州防禦
使歷官仁智愛利及民歷吏部尙書致仕

王式太原人起子擢賢良方正科大中中爲晉州刺史飭郵
傳器用畢給會河曲大歉流民徙他州不納獨式勞恤之活
數千人時特峨胡亦饑將入寇汾滄聞式嚴備不敢道境報
其種落曰晉州刺史當避之以善最稱後平浙東仇甫功尤
偉終左金吾大將軍

李良金京兆新平人客遊朔方佐節度使論弓仁幕以邊功累官至晉州刺史大厯中兼職河中營田事規畫疆理巡閱耘耔法立令行人莫敢犯三年卒於河中

鄭會字景參滎陽開封人由資陽尉累遷至慈州刺史墓碑稱其在州發明典制糾剔瑕慝化有程稱人用安

王履清京兆萬年人從汾陽王郭子儀前後以功遷官十五任爲朔方節度副使大厯中王以吉昌濁河上游邊郡戎州易動難安奏授慈州刺史在州有異政十一年卒於官履清性友愛嘗割股肉療弟疾弟濟清亦官慈州別駕

陶善鼎爲臨汾縣令縣東北十里舊有高梁堰武德中引高梁水溉田入百金泊貞觀十三年爲水所壞永徽二年刺史李寬自東二十五里夏柴堰引瀘水溉田善鼎復治百金泊

亦引瀟水溉田乾封二年堰壞乃西引晉水盡心民事

崔翳爲曲沃令永徽元年於縣東北三十五里開新絳渠引古堆水溉田百餘頃

張懷器以成均學生明經擢第俄補麟臺校讐累官至咸陽縣丞嗣聖間以應舉及第授翼城令引翔高之泉以便灌溉開滄陰之道以通行旅又闢荒田五百餘頃邑人愛之盧照鄰爲撰去思碑

李侃建中末項城令李希烈遣兵攻之侃嚴守不下賊引去詔遷太平令以上平陽府

李崇義河間王孝恭子嗣爵譙國公歷蒲州刺史益州大都督府長史有名終宗正卿

杜楚客如晦弟京兆杜陵人隱嵩山貞觀四年召拜蒲州刺

史甚有能名坐魏王事免尋授處化令

薛萬徹咸陽人貞觀十七年爲蒲州刺史於虞鄉縣北十五里開凍水渠自聞喜引凍水下入臨晉遷代州都督永徽二年坐房遺愛遇害

蔣儼常州義興人貞觀中使高麗守節不屈拜朝散大夫高宗時累遷蒲州刺史蒲州戶產殷劇訴扞積年不平前刺史多不稱職儼下車未幾令行禁止稱爲良牧以老致仕永淳中復起封義興縣子以太子詹事致仕卒贈禮部尙書

楊元挾虢州閿鄉人姿儀甚偉以器局見稱載初中爲晉蒲二州刺史累降璽書褒美以右羽林將軍與誅張易之封宏農郡公睿宗初遷刑部尙書改封魏國公致仕卒謚曰忠

畢構字隆澤河南偃師人第進士開元初爲蒲州刺史時州

人衛大經有行義隱居不仕構謂解縣令孔慎言曰衛生德厚宜有旌異古人式干木之間禮賢故也慎言造大經門就謁之構累進戶部尚書改詹事卒諡景

韋抗京兆萬年人安石從父兄子舉明經開元中蒲州刺史歷拜刑部尚書掌吏部選事歷職以清儉自守不務生業及卒喪事殆不能給特給楫車諡曰貞

裴寬絳州聞喜人舉拔萃歷蒲州刺史久旱入境輒雨開元二十九年除太原尹賜紫金魚袋元宗賦詩餞之曰德比嶽雲布心同汾水清終禮部尚書贈太子太傅

李尚隱萬年人舉明經爲蒲州刺史有浮屠懷照自言母夢日入懷生已鏤石著驗州人馮待徵助實其言尚隱劾妖妄詔流懷照播州累遷御史大夫卒諡貞尚隱三入御史府輒

繩惡吏素議歸重

裴千鈞字孝卿天寶末爲萬泉令賜紫金魚袋千鈞好賓客
聞人奉親有乏甘旨者輒分財贍之有德政碑

李模襄邑王神符曾孫至德中爲荷氏令史思明陷洛陽賊
帥掠諸縣模率衆拒之稍遷黔中觀察使終太子賓客

唐昇爲河東縣令大厯七年袞昇階朝散大夫更留二年旌
善政也

薛廷老河中寶鼎人存誠子第進士寶厯中爲右拾遺以數
直諫又忤李逢吉出爲臨晉令文宗卽位入爲殿中侍御史

再遷給事中

以上蒲州府

李元嘉高祖十一子初封徐王貞觀六年授潞州刺史時年
十五在州聞太妃有疾涕泣不食十年改封韓王授潞州都

督元嘉少好學閨門修整有類寒素修身潔已內外如一高宗末轉澤州刺史垂拱中徙絳州遇害

李元懿高祖十三子封鄭王初刺兗州徙潞州絳州數斷大獄有平允之譽高宗嘉之降璽書褒美賜物三百段咸亨四年卒諡惠今城南有元懿太妃墓長子有石記頌德

李嗣正字承胄趙州柏人人多藝數尤精音律舉明經縣令以善政聞永昌初歷拜右御史中丞知大夫事命巡撫河東薦宋溫瑾袁嘉祚李日知拔州縣職皆至顯官時來俊臣獄方熾嗣正上書切諫出爲潞州刺史爲俊臣所誣貶藤州卒諡曰昭

姚崇陝州硤石人睿宗時以兵部尙書出爲申州刺史移潞州又遷揚州長史政條簡肅人爲紀德於碑

李潛太宗族子開元中潞州刺史轉劍南節度使所歷以誠信待物稱爲良吏卒諡誠

程千里本磧西人居京兆天寶十四載詔於河東召募充河東節度副使雲中太守十五載正月遷上黨郡長史特進攝御史中丞以兵守上黨賊攻城屢爲千里所敗加開府儀同三司禮部尙書兼御史大夫至德二載九月賊將蔡希德圍上黨輕騎挑戰千里恃勇開懸門率百騎欲直擒希德幾得而救至乃退會橋壞馬顛爲賊執仰首勅諸騎使還曰爲我報諸將可失帥不可失城軍中皆爲泣下增備固守賊不能下乃遣囚千里至東都爲嚴莊所害後追褒死難者惟千里生見執不及云

崔珏一名元靖樂平人貞觀間爲長子令廉介公直發奸摘

伏民不敢欺時有虎傷人珏祈諸神遣使追虎至而殺之民爲立石頌德

薛僅字用冲漢御史大夫廣漢後開元間上將巡潞藩擇賢能爲長吏俾宿儲供僅以拾遺宰屯留略無愠色躬親庶務諸事克辦朝廷稱之次年歲歉出公私米振活以百萬計又防水患邑大治以異能稱民立碑頌之

以上潞安府

薛大鼎蒲州汾陰人父粹隋介州刺史大鼎武德初謁見龍門以功累拜涪州刺史徙滄州里民歌其美政卒謚恭

蕭顓武德二年爲汾州刺史引文谷水入汾州溉田顓利入寇總管李神符敗之於汾東顓邀擊之獻俘五千

李道堅靈夔孫嗣魯王景龍中汾州刺史歷授河南採訪使以清毅稱卒贈禮部尙書

楊隆禮湯帝曾孫景雲中汾州刺史性清嚴能檢察人吏欺
隱殆絕開元中封宏農郡公授戶部尙書卒

杜希望京兆萬年人開元中代州都督召還京師對邊事元
宗才之拜鄯州都督宦者牛仙童行邊或勸希望結其驩答
曰以貨藩身吾不忍仙童還奏希望不職下遷恆州刺史徙
西河太守而仙童受諸將金事泄抵死昇金者皆得罪希望
愛重文學門下所引如崔顥等皆名重當時

陸瓌字仲采蘇州吳人舉明經累除洛陽令中書令蕭嵩擢
之嵩罷他宰相出之爲太原少尹天寶間徙西河太守封平
恩縣男屬邑多虎前守設檻穿瓌至徹之而虎不爲暴

薛從字順之龍門人平子以蔭累遷汾州刺史隄文谷瀘河
二水引溉公私田汾人利之徙濮州終左領軍衛上將軍贈

工部尙書

崔圓字有裕貝州武城人舉鈐謀甲科至德二載以成都儲
供功拜中書令封趙國公乾元元年削除累改汾州刺史以
治行稱卒諡昭襄

李勉字元卿鄭惠王元懿曾孫至德初拜監察御史累擢太
常卿李輔國諷使下已勉不肯乃出爲汾州刺史不威而治
卓然有聲歷拜檢校司徒平章事封汧國公卒諡曰貞簡
劉暹南華人晏兄德宗時汾州刺史天資疾惡爲觀察使所
畏上徵之將用爲御史大夫盧杞沮之終潮州刺史

李漢字南紀雍王八世孫少事韓愈通古學屬詞雄蔚爲人
剛烈類愈愈愛重之妻以女擢進士第爲史館修撰書宰相
李吉甫事不假借子德裕惡之後德裕輔政漢坐李宗閔黨

以御史中丞出爲汾州刺史有善政及宗閔再逐改州司馬尋徙絳州長史大中時召拜宗正卿

賈耽字敦詩其先長樂人天寶十載舉明經累遷汾州刺史凡七年有異績召授鴻臚卿貞元中以尙書左僕射同平章事封魏國公卒贈太傅諡元靖耽嗜觀書尤悉地理爲圖廣三丈從三丈三尺以寸爲百里本之禹貢及班固漢書古郡國題以墨今州縣以朱刊落疏舛多所釐正又箸貞元十道錄其器備然著長者也不喜臧否人物檢身勵行家人近習不見其喜愠

魏謩字申之鉅鹿人文貞公徵五世孫太和進士累拜諫議大夫以直諫稱始謩之進李鈺楊嗣復實推引之武宗立坐二人黨出爲汾州刺史後大中五年進同平章事十年出爲

節鎮卒贈司徒宣宗嘗曰暮名臣孫有祖風然以剛正爲令狐絢所忌讒罷之

王儉武德初石州刺史二年朱金剛破石州儉被殺

杜正倫相州洹水人隋時舉秀才唐貞觀中歷中書侍郎兼太子左庶子坐貶久之授石州刺史顯慶元年累擢同三品遷中書令李義府構之貶橫州刺史卒

李元名高祖第十八子封舒王貞觀二十三年爲石州刺史性高潔不問家人產業朝夕矜莊門庭清肅常誡其子曰藩王所乏者不慮無錢財官職但勉行善事忠孝持身此吾志也在石州二十年賞翫林泉有塵外之意武后時遷利州遇害

武昭陳留人果敢而辯嘗從裴度討淮西入蔡州說吳元濟

度鎮太原奏授石州刺史罷郡歸長安以氣俠自許李逢吉欲沮度復相被誣死

楊越宏農仙掌人太宗初定天下網羅遺逸越曰天下有道可以出而見矣以角巾褐衣應命陳謨太宗曰石州邊方未霑王化汝往輯禦以息邊患任石州方山令見陳伯文集

張沖字孝源清河東武城人垂拱中官介休令以清德稱

楊仲昌字蔓虢州閩鄉人元揆之子開元中對策第一授蒲州法曹參軍判入異等遷監察御史出爲孝義令撫字百姓

耕桑樹藝莫不躬教一日方視事鸞降庭樹太守蕭恕表其政徙下邳令終吏部郎中仲昌資長於吏御身以約

以上汾州府

長孫順德長安人爲高祖太宗所親委拜統軍從平霍邑破臨汾下絳郡尋執屈突通略定陝縣封薛國公貞觀中拜澤

州刺史政號明肅先是長吏多受餽餉糾摘一無所容稱爲
良牧前刺史張長貴趙士達並占境內膏腴田數十頃劫而
追奪之資給貧戶尋坐事免卒諡曰襄

岑翔爲澤州刺史先天二年太上皇命有司頒賜諸州朝集
使善政者遂以翔與同州刺史成大宛及陝州刺史陸餘慶
魏州刺史單思遠宋州刺史劉智柔等各賜物一百段

李攜雍州長史新興王晉司功也晉遇害寮吏皆奔散惟攜
步從仍哭其屍姚崇聞之曰樂向之儔也擢尙書郎轉澤州
刺史

李陽冰乾元間爲高平令愛民之憂志切休養博學善書事
至談笑處之裕如也

郝福貞元間爲高平令才高事練遭時凶歉移粟分給所在

霑被罷止征需不急者以身任咎流亡盡復

明濟貞元間自屯留令調任高平富文學有清節敏於吏事
所至有聲嘗濬治丹河民免水患

崔深咸通中知陵川縣撫化百姓甘棠頌德瑞應見屬鄉之

禮義村

以上澤州府

高君狀齊州人引大義諫齊王祐祐擊擒之愧其言不能殺

祐敗詔擢榆社令

遼州

孟神慶華州華陰人永徽初沁州刺史以清介著名

裴行立稷山人守貞曾孫以軍勞累授沁州刺史遷衛尉少

卿口陳願治民試一縣除河東令寬猛時當歷安南都護卒

贈右散騎常侍

王思禮高麗人以戰功遷兵部尙書霍國公兼潞沁節度使

思禮善守多積儲持法嚴整人不敢犯故多戰功保全境土
唐漢賓莒公儉之苗裔也會昌間昭義節度劉從諫署為武
鄉令從諫卒于祺拒命漢賓固諫不從舉族見害昭義平敕

贈武鄉令

沁州以上

殷開山名嶠以字行鄆縣人初為隋太谷長又為石艾長高
祖起兵召補大將軍掾從攻西河招慰關輔降羣盜封鄖國
公圖形凌煙閣諡節貞

平定州

李丕與劉從諫善署昭義大將及劉祺阻命軍中疾其才丕
懼乞為游奕深入遂自歸武宗召見擢忻州刺史太原楊弁
亂遣人誘丕丕斬之以兵扼走集李德裕曰度支戶部物積
代州今丕塞其路賊破矣乃趣丕討弁兵未至而弁已擒遷
汾晉二州刺史大中初拜振武節度使檢校刑部尚書卒

忻州

賈循京兆華原人有大略爲邊將累功厯光祿卿安祿山兼河東節度表循兼雁門太守爲副祿山趨東都使循守幽州與顏杲卿連謀遇害贈太尉諡曰忠

韋懷質貞觀中繁時令太宗伐高麗命韋挺運餉至盧思臺不進上令懷質往挺所支度軍糧檢覆渠水以上代州

姜師度魏人舉明經開元初遷陝州刺史開運道以便太原倉兩京水陸轉運所省萬計六年以蒲州爲河中府拜爲河中尹先是安邑兩池漸涸師度發卒開拓疏決水道置爲鹽屯大收其利師度勤於爲政又有巧思所至興溝洫之利公私賴之終將作大匠

元可哲字知人河南洛陽人武后時夏縣令卒於官縣人爲刻石頌其清德

李涓開元中夏縣令有德政碑

劉晏字士安曹州南華人舉神童授祕書省正字累授夏縣令有能名歷拜門下侍郎同平章事

韋澳字又元京兆杜陵人貞元中夏縣令有遺愛碑

以上解州

羅士信齊歷城人大業中年十四從通守張須陁擊賊以驍勇顯武德初歸國以功擢授絳州總管封鄒國公從征劉黑闥城陷遇害時年二十八諡曰勇

李元軌高祖第十四子封霍王貞觀十年授絳州刺史閉閣讀書吏事責成於長史司馬謹慎自守與物無忤爲人不妄垂拱中至陳倉卒

李元禮高祖第十子封徐王貞觀十七年爲絳州刺史以善政聞太宗降璽書勞勉賜以錦綵永徽四年加司徒兼潞州

刺史咸亨三年卒

鮮于紹爲絳州刺史高宗儀鳳中刺同州仍賜絹二百匹賞清廉也

李元嘉高祖子封韓王垂拱中刺絳州與越王子沖圖舉兵

沖敗元嘉至京師謀泄后逼令自殺已見路安府重出

李湛義府幼子沈厚有度襲河間郡公則天末與敬暉等誅張昌宗張易之神龍中爲絳州刺史累拜左領軍大將軍開元十年卒贈幽州都督

于知微字辨機京兆萬年人志甯孫也累官蒲晉二州刺史長安二年改授絳州刺史州管軍府戶多彫散知微隨方撫馭應時而理奸盜出境流亡復業遷太僕少卿封東海郡侯景雲二年進公卒姚崇爲撰碑

張知審蒲州河東人擢明經第則天朝晉州稷州刺史又歷房和舒延德定洛宣貝洛同華十三州所在以循良稱累拜大理卿封范陽郡公卒

李朝隱字光國京兆三原人以明法舉拜臨汾尉擢至大理丞神龍中爭五王不宜輕用法貶嶺南宰相言其清正上更以爲聞喜令遷絳州刺史復爲大理卿訊武疆令裴景仙丐贖言其先寂有國功宜宥景仙得不死後拜御史大夫充嶺南採訪處置使卒諡曰貞

韓思復字紹出京兆長安人長山縣男倫孫舉秀才高第襲祖封爲刺史治行名天下開元中歷絳州拜黃門侍郎元宗北巡爲行在巡問振給大使遷御史大夫進伯卒諡曰文上親題其碑曰有唐忠孝韓長山之墓

嚴浚華陰人爲絳州刺史威惠並行吏民畏服

嚴挺之天寶間爲絳州刺史明皇欲進用李林甫忌嫉之因招挺之弟損之伴與敘故舊云當以子爲員外郎又云朝廷待賢兄極深須作一計入京旣見當有大用令損之取絳郡一狀云有少風氣乞入京師就醫林甫持狀奏云挺之年高近患風氣且授一閑官天子歎咤久之林甫奏授員外詹事便令東京養疾

李栖筠字貞一趙人第進士李光弼守河陽高其才引爲行軍司馬兼糧料使至德中改絳州刺史累遷御史大夫封贊皇縣子卒謚文獻栖筠爲天下士歸重不敢有所斥稱贊皇公云

韋陟字殷卿安石子襲郇國公肅宗初歷拜御史大夫坐事

出爲絳州刺史判尙書省事卒諡忠孝陟早有名爲李林甫
楊國忠擯廢而海內望其爲相云

蘇震雍州武功人瓌孫誦子彊學有成人風伯父頽曰吾家
有子至德中累拜文部侍郎從廣平王平長安後爲絳州刺
史以勞封岐國公終太常卿贈禮部尙書

盧元輔字子望宰相盧杞子以清行聞擢進士歷絳州刺史
課最召授吏部郎中進兵部侍郎卒元輔端靜介正人不以
杞之惡爲累云

李憲晟子初調太原府參軍事歷遷絳州刺史絳有幻人怵
民以亂憲執誅之濱汾相地治新倉免負戴勞絳人利賴後
以平淮蔡封涼國公以平淄青晉同平章事爲昭義節度使
卒諡武

韋武京兆萬年人貞元中自禮部員外郎出爲絳州刺史鑿汾水灌田萬三千餘頃墾書勞勉元和初入爲京兆尹卒贈吏部尙書

樊宗師字紹述河中人澤子擢軍謀宏遠科爲絳州刺史有治迹進諫議大夫卒宗師家富好施妻子告不給則其爲吏之廉可知矣

楊大寶鳳翔人武德初爲龍門令劉武周陷晉絳攻之不降城破被害褒贈全節侯

皇甫忠貞觀中龍門令甚有惠政歲滿縣民裴公隱等一千三百人申省請留旣不得請乃相與建碑頌德著作郎李儼爲撰文云

長孫恕貞觀二十三年爲龍門縣令於縣東南鑿十石壩渠

漑田良沃畝收十石縣西二十一里馬鞍塢亦恕所鑿

蘇昱字奉景京兆武功人高宗時由明經上第歷沛王府參

軍遷聞喜縣令在官三年多惠政將代老幼追攀樹碑頌德

終濟州刺史

王樂為龍門令有能名李勉薦之時稱知人祀名宦

王晬初為鄭南令為權倖所誣免以推擇為龍門令有能名

以上絳州

李琛高祖從父兄子封襄邑王歷蒲絳二州總管宋金剛陷

滄州時稽胡多叛琛為隰州總管以鎮之馭眾寬簡夷夏

安之三年卒

隰州

右唐一百一十八人

張仲溫長興元年為翼城令才識饒敏縣舊治翔高山下風

氣雖敦而險隘不足仲溫建議徙置王逢寨據險以守今縣

治卽其地也

平陽府

李存賢許州人本姓王太祖養爲子遷沁州刺史先時沁州當敵衝徙其南百餘里據險立柵而居至存賢爲刺史日徙城避敵豈勇者所爲乃復城故州梁兵屢攻之存賢力自拒守卒不能近遷武州刺史山北團練使又遷慈州天祐十八年梁兵攻朱友謙於河中莊宗遣存賢援之是時河中食少人心多疑謀者曰河中人欲殺子以歸梁宜亟去存賢曰死王事吾志也復何恨哉卒擊走梁兵後爲盧龍軍節度使卒郭饒沁州縣上人以驍勇數立軍功爲沁州刺史者九年爲政有惠愛州人思之

以上沁州

相里金字奉金井州人爲人勇悍而折節下士同光中拜忻

州刺史是時諸州皆用武人多以部曲主場務漁蠹公私以
利自入金獨禁部曲不與事厚其給養使掌家事而已清泰
三年以金為太原四面步軍都指揮使晉高祖立為建雄軍

節度使卒贈太師

忻州

右後唐四人